

UNA GITA AL “VIOZ”²

“Forza, svelti cl’è un bel dé,
dai i prissia, ch’as aviè!”
In t’i pì du o tri cazté
e a sò bela che amané!
So in t’è Vioz, quest l’è par nò
una grand sudisfaziò
d’arivé cun poch nervos
indov ui è pianté la cros.

Vecc, burdell e a mezza vî,
as infilè par l’ovovî;
l’è un gabinot a spinduclò
che fa propi un pò impressiò
e se tsté senza arvì boca
e silenzi e cor ut toca.

I piò znì is god la faza
a’lé insdé in tla scaranaza
che dundlend avanti e indrì
l’at arsparmeia i chèll di pì.

L’è cminzé e sintir de Vioz
che al chesca za d’al gozz.
E sudor e pasa al mai,
mo quelcadò e dis: “dai, dai!”

Dis minut ch’a sen in zir
e me a tir in te respir.
“Sta a e pass, propri imbezell
a vit s’ie brev tot chi burdell!”
Farmiv un pò, ch’an voi ssciupé!
Lassim imanc fem respiré!

Ormai tre or ch’a sen in zir.
Quand a fnessal st’e sintir?
Fra tutt qui ch’iandeva a l’”erta”
una cosa l’era zerta:
us avdeva da la faza
cl’a carseva la buaza.

E repert d’al trasmission
e cminzé la su mission:
a mezz dé e culegament
cun iamigh e i parent

(al parol als trasfurmeva
e par l’eria al travarseva).

Da lassò un pò amiré
tott la blezza de creé.
Ott e mezz, culegament
cun tutt quanta cl’etra zent
che savend ch’a semia in zir
in avleva sté in pinsir.
“Pora stèla, a sit ariv’?
Guerda ben d’no fe e cativ!
E te purì, cum sit spiané,
tan saré miga amalé!”

A la mèza i prem iè za in tla “vetta”
e ch’ietar i dis: non abbiām fretta!
Fati faz c’us ved avnì!
A gran fadiga i’elza i pì
come se cazté e scarpò
i foss pì d’gera e sabion.

“Ecco ai sè, ecco e rifug!”
s’an stèg pront um scapa un rug.
“Par la grèzia d’tott i sènt,
quest l’è propi alenament ! »
Un po’ d’ripos e una magneda
par spiané la “camineda”.

La muntagna, sé, l’è bèla!
Mo e bsogna guadagnela!

² Dedicata ad una scalata al monte Vioz, durante un campo vacanze, anno 1980.